

五

峯

遺

稿

五峯遺稿卷之十九

墓表

鄒輔之妻周氏墓表

余少為諸生時與庠友鄒君輔之交最厚輔之家去
邑城數十里月一歸省其親歸則輒復來來則其氣
充然若無不足者余嘗私恠輔之能脫然不以家事
累其心也間問之則知其得於妻之內助者居多焉
輔之嘗語其妻之賢曰吾妻大家女及笄歸吾恪守
婦道自吾之遊學在外吾妻居家孝事舅姑旦起必
上堂問安否退與妯娌處怡怡如也其自奉必儉以

約其施惠於人必洽以周使我得專其業而不以私累其志者吾妻之助也吾妻雖婦人雅知所重吾每自外歸必問常所交往者何人既聞獲與君厚喜曰取友得秦某不妄矣吾平生有志科目既齟齬窮不無惆悵色吾妻恒以理慰解之曰男兒窮達有時顧可以力求耶輔之之言如此余固已知其賢矣既而輔之竟鬱鬱得心疾孺人幾少迎醫治之弗効則憂愁涕泣毅然以立門戶為己責崇儉黜靡率其下日治麻枲撫諸子及女以長以教克底成立輔之病既久帖帖卧牀孺人親為蠲除不潔時其饑渴而飲

食之如是者三十年未嘗以勞苦自卹治家有方凡
家之故產視輔之無恙時不毀一跡晚年貲益饒遂
命諸子一新其居以弘世業新居甫成而孺人疾竟
不起臨終泣謂諸子曰吾不及事汝父終其身沒有
餘恨若等其善保護之言訖而逝時弘治辛亥六月
十九日也享年五十有九孺人姓周氏諱永清世居
邑之周涇祖諱尚文考諱廷韞號朝畊俱遜世肥其
家妣鄒氏子男三長弁娶錢氏次袞娶華氏次鵠娶
華氏女二長適王謙先卒次適華又孫男二曰雷曰
霆女二以又明年癸丑正月十九日葬于泰伯鄉之

寧山先塋升等先期以鄉先生李綱庵狀來乞文表
其墓余惟婦人之道平居處閨門相其夫非難而處
患難不易其操為難今孺人事其夫於困厄中苦心
焦思歷三十年不少衰卒能再造有家沒齒保其夫
之無恙亦難能矣況其疇昔內助之賢又卓卓可稱
者乎易曰恒其德貞婦人吉孺人有焉故不辭為述
所聞表之以為世婦勸抑使其後之子孫有考云

羽化雪巖范君墓表

道侶范君玄機既卒之數月其弟子今道會許真常
將以次年三月廿有二日葬于龍山河許之原先期

以狀來乞文表諸慕道真常抱冲體和道派中之楚
楚者觀弟子則知其師况余與真常有方外交言可
靳耶按狀君姓范諱榮字玄機別號雪巖世居錫之
蓮蓉門外祖原德父文質君生有奇質丰神瑩潔雪
明而玉溫自幼即有志老氏之學禮洞虛宮雷岩龔
太冲為師屏華絕靡凡瞿聃之書莫不精究正統間
邑侯項公舉為城南祠山行宮住持君率其徒以往
種樹築室為栖真之所飛樓翹空嘉泉遶庭敬恭翼
冀千靈來居由是玄風寢振遠近向慕脫益蕭散以
麴蘖自娛紫簫吹月綠杯揮春不省人間事閒披鶴

縑衣戴華陽巾登樓嚮傲與仙人王子晉神遊碧落
之表忽一日午寢委銳而去實成化辛丑六月望日
享年六十有六弟子六人長即真常次蔣雲溪等徒
孫六人周景星等夫凡為老氏之學者以清絜無為
為本弗汨其真弗老其形冲焉默焉而至道以凝若
君者容容于于弗鑒弗剝其真斯人之徒也歟故為
表之而系之以辭曰

嗟茲人兮仙遊藏遺劍兮山之丘寂寞兮真館掩方
塵兮涵秋蘭生兮澗兮猿吟兮谷幽瞻笙鶴兮不返
悵余懷兮綢繆

竹友處士墓記

余邑有老成篤實之士曰華君守誠者事親以孝聞
天順間母徐忽遘疾勢危甚君惶遽無措剗股作羹
以進母飲之尋愈衆咸稱之聲聞都邑時學士淮南
高公輩皆有詩贊其事若聞驚曰向吾不幸不得已
偶為此要非聖賢中庸之道吾方以為歎諸公領以
為美乎為跼躅不安者累日以是人莫敢復言夫剗
股事非古然世之小丈夫往往因是以徼名干譽至
有希求旌典者君乃厚自貶損一律之以聖賢之
道以彼視此其賢不肖相去何如耶君之先出南齊

孝子寶後隨宋南徙居無錫之隆亭再徙瑛陽元季
有諱公恒號貞固者又徙延祥鄉之鵞肥蕩蕩口之
華自貞固始貞固生仲諱號樂勤樂勤生思浩號澹
然是為君之考娶於鄒先卒繼娶徐生君君資端重
與世無競人有善稱之有過則為之掩覆不暇即有
犯受而弗較恢恢乎樂易長者也感上世以孝起家
恒自檢飭雖擁高貲而持家謹謹不以驕侈敗度歲
饑嘗輸粟受七品官非其好也顧獨愛竹故以竹友
稱尤嗜吟詠築室東皋躬畊遜世暇則短衣長帽獨
行丘壟間吟嘯自若或從叔正省翁為竹林嘉會意

態蕭然城府中終歲無一跡其高致大率類此所著
有言志集集古稿藏於家弘治辛亥十月六日不幸
以疾卒享年五十有六配錢氏子男三長鍾娶市次
鐸娶鄉繼浦次鑑娶錢文一歸故士人鄉翹幼子三
曰某某其女一皆某出孫男女七人俱幼將以壬子
三月某日附葬於澹然翁墓側其孤鍾等先期以楊
宗虞所為狀來徵文表其墓余固雅重君之行故不
辭為述其槩貽之俾勒諸墓道非特詔其子孫永以
為世勸云

周孺人墓表

孺人姓趙氏諱某其先出宋魏王廷美之後靖康間
從恩陵南渡遂占籍無錫父諱光遠娶高氏生女三
孺人其季也孺人少有至性孝友聰明不煩傳教為
父母所偏愛及笄擇所宜配得孔美入門執婦首其
恭舅姑皆高年婆婆一堂孺人時其寒饑而衣食之
鮮毳畢具怡怡愉愉情若孝女和其齊恤其宗姻歲
時以禮幣酒食相綴接凡戚疎富貧一無間言孔美
家世業醫為醫師之良尤精嬰兒痘疹一言決死生
不少誤富家有千金子必延致孔美療之每春月戶
外履恒滿孔美或被酒不時出孺人必強之行曰嬰

兒父母望子若解倒懸柰之何其濡且滯也歸必問
疾勢得否得則為喜其能濟人之急如此孔美性好
客每與客飲孺人數出異味餉客雖一蔬一菜必殫
其精潔客亦熟其故不詢所自鄉人至今以為美談
晚年以胤嗣不繁撫子若孫尤極其慈母皆卓然底
於成立卒於成化癸卯十二月二十七日享春秋七
十有三子男二長曰慎有行檢克世其家次曰恒女
一適庠生吳貴孫男一曰綱孫女一曾孫女一俱秀
卜於明年十月初六日葬于龍山新阡慎先期以里
儒余方所為狀乞文表墓辭之屢而求之愈慙嗚呼

先王之教必自閨門始其所關繫斯亦重矣自世教
衰王化不行士無完德豈直女婦哉今孺人自束髮
以至皓首慈惠敬恭於婦道母道舉無違缺里族之
婦有薰其德而為善者夫化之行在教之有道教則
行否則止然則若孺人者雖不需文吾猶將張之况
其求之懇也故用表其墓以勵來者

故桂月處士鄒公墓表

皇明有天下一百二十八年於茲天下之民生養休
息老子長孫比屋有之至若喬木詩書鬱然故家遺
風邈其世傳越自先代至今綿綿數百年子孫一仍

不替益繁者則亦罕焉况良材美質迭生其間交將
為之後先學問為之潤色嘉言善行歷歷可考如此
者求之百里之間欲得一二人焉不可得矣間有是
者吾獨於鄒處士公彙家世見之鄒之先出宋忠公
浩世家常州浩之弟元豐進士洞生子朴始由常徒
居錫之華庄由朴四傳至仁聲號南山以將仕郎補
漕試迄宋亡乃棄去元丞相阿塔海辟知本州事不
就及卒趙文敏為題其墓南山生嘉興路儒學教授
德俊號梅堂嘗延天台名儒胡世佐主塾既老作壽
山於艾墅極宏麗胡公記之宋澤民圖之一時名士

若尤良岳掄又從而歌詠之卷帙尚存教授生師亮
師亮生隆高嘗與倪元鎮陳子章為文學友唯高生
慶遠慶遠生以安實慶士之考也慶士生而長身美
髯風格峻整人望之悚然起敬然能接引後進雖晚
學與之語必援古証今以起其聽疊疊不厭人亦以
是親之承先世遺風早歲即從師遠遊卒以儒名於
鄉性孝友初以安翁欲遷居壽山之西慶士先意承
志凡經營構繕一以身任其勞不敢必懈曰翁年已
老吾得營新居為翁一日養足矣喜動顏面君子稱
焉慶兄弟怡怡愉愉不計利傷義執喪能哀待群從

子弟有教有勸撫孤嫗尤加意與人交和而能終不
妄嬉以狎不肆矜以驕其善行大率類此詩長於近
體歌行其佳處自以為得江山之助嘗西上金陵覽
帝都形勝一遊錢塘吊南宋遺跡悲歌激烈所遊益
奇其氣益充詩益精清詞麗藻膾炙人口久之宛然
有得即歸卧草堂杜門不復出邑大夫歲招鄉飲亦
不赴空視一世若無足以動其中者家故有老桂數
株結廬其旁每月夜天香浮動輒引酒獨酌或與客
觴咏其中以自適回以桂月自號樂天知命既老命
家人具棺衾作壽藏於九曲之北營域甫成而公病

美尚慮後世子孫以奢縱債家語子弟之賢而長家
者昂以崇雅黜浮以為子孫式病亟復以是戒其子
言不及他尋卒實其年某月日也享年七十有五配
周氏有賢行子男二長即寬娶張氏次實朱出娶王
氏繼錢氏女三長適吳仁次適白忠先卒次適楊繹
孫男三曰胤曰律曰某女二曾孫男一女一俱幼寬
以卒之明年十一月初九日將葬處士於九曲之藏
先期以李齊明所為狀來乞文表其墓因得觀其世
家文獻之盛故為次第書之夫子嘗觀世之名門巨
族其上世莫不以儒而興然不數世其子孫廢驥習

為著繼淪棄詩書之澤遂至質其家聲者比比皆是
今鄒氏自忠公以一代儒宗開其源至南山梅堂諸
老又汲汲取友於當世老師宿儒以濟其流迄今又
有若處士者依依不去其業是宜其世澤之長獨感
於當世也噫若處士者亦可謂鄒氏之賢子孫哉表
其墓以為世勸後之過墓門而下馬者尚考於斯文
有恒處士葛君墓表

無錫有奇士曰葛君諱威字重之別號有恒其先家
暨陽有諱雅甫者仕宋為吏部尚書實以詩禮濟其
源至衛國清孝公書思魯國文康公勝仲丞相少師

文定公輝相繼以德業文章導其流而家譽益振君
之裔山自清孝公至大父壽始遷無錫考泰輝母李
氏君性介特讀書明理適體素羸若弗勝衣而其中
靡然有執守當其閒義而起雖貧育弗能過家甚單
以清苦自持勸之仕弗應有宅一區僅庇風雨布素
蕭然已有多田夫以財自豪君曾不舉目睨之嘗讀
宋太史所著王元章小傳慕其高潔曰白牛生殊可
人意時時學其寫梅筆意清勁凡饋遺辭紆一於梅
發之若與元章神交數百載前或譏其清儉君笑曰
我道蓋是也既而嘆曰吾先世多貴人詎可便遺

我而自泯耶聞醫之為術可利人與良相等行吾志
者其在是乎即去而業醫得近代朱丹溪心法療人
若持券責償千不失一尤不喜神仙脩煉之說曰昌
黎韓子所為李博士銘其後人之通鑒歟家嘗有怪
甚異燈下或見其狀勢憚惡微博人聞呼君名曰葛
威吾能成若生若若貨財怖我乎君方手卷一誦弗
輟若罔聞知家人俄報曰鬼弄扇君徐曰熱耳又報
鬼吹火曰與之筒屹弗為動鬼亦尋滅此奇事鄉人
尚能誦之嗚呼自妖誕惟異之說興雖纓冕之家甘
心事鬼靡然成風若君者恠臨之尚弗惑况肯事之

乎此真可勵世而矯俗矣晚年得奇疾杜門以藥自
治不論戶限者數載病且革語其子告曰吾性不喜
暗昧即死買向明地葬我自遂寢寢實成化戊戌九月
十二日也享年春秋五十有八配孫氏子男二長即吉
次祥女二長適曹公佐先卒次適劉廷佐孫男二曰
正曰方孫女一適葉氏以己亥歲三月二十八日卜
葬于繁山之陽遵其志也表而系之以辭曰

行表表兮寡伉作玉雪兮氣凌秋候仁聲兮濟世履
坦坦兮何憂激頰波兮揚素流歟則奇兮將焉尤蘭
芳兮幽谷木橋兮崇丘耿佳入兮不返悵余懷兮網

繆

慶士李君墓表

鄉慶士李君四端既卒嗣孫幼弗克葬越明年其伯父舜明甫為塋宅兆於龍山黃家灣之原既得吉卜則挾其孤來乞文表其墓且曰四端待是瞑目地下惟執事矜而畀之余既哀四端之不幸且重違舜明甫之請遂不辭而諾諸四端諱允姓李氏其先陳留人宋有諱傳者官儀同三司從高宗南渡始家無錫子琳累官敷文閣待制吏部尚書尚書生泉州通判大亨通判生六合縣丞柯四端十世祖也高祖伯器

國初舉孝廉不就曾祖景脩祖桓仲考舜功皆以道德文學名世母朱氏四端幼穎敏五歲能暗誦孝經小學稍長連失怙恃然無依教育於舜明甫好學攻書不煩訓諭閒落筆為詞章解出新意不為稚弱語舜明甫喜曰吾弟有子矣久之其學益肆以博詩五七言近體勁健俊麗有唐人風致尤精古選歌行閒放王友石作山水小畫亦有遠趣可愛名舜益起成化中先公貞靖先生嘗與鄉耆俊十人開社賦詩白首婆娑斯文有光時四端齒尚未及諸公皆折草行願與之交更唱迭和人咸

自蔡視世俗屑屑舉不足以動意獨慕稽康阮籍
為人豪爽不羈喜面折人過故士之樂軟媚而習卑
汗者亦不甚親附之四端旣自顧不合於世則一混
以酒飲大醉頽然自放嘗客授文峯楊氏館近館
峯巒環列如畫四端課諸生晝日與其所遇逢登臨
觴飲為樂以醉為度醉則仰天嗚嗚或口占賦詩以
發胸中之奇然卒以是致疾淹淹竟不起四端家故
貧晚稍饒裕痛養不及親時節薦祭輒誦歐陽公祭
而豐不如養之薄之語悲涕流連不勝風木之感因
別號思齋以示意事繼母錢尤恭謹其行大率類此

卒以弘治七年十月十二日享年四十有四而葬則以八年十月二十一日也配馮氏子男一曰鳳來聘楊氏女三長適邵采次受倪觀聘一尚幼烏乎四端抱超逸之才高蹈物表跡其所為疑若近夫空疎而自外禮法者及質其平生行事薦倫理崇信義又不失乎彛倫日用之常然則若四端者其莊周列禦所謂近道者非耶惜天不假之以年而竟止於斯可哀也已吾故表而出之使後之過墓門而下馬者於斯有攷焉

五峯遺稿卷之二十

誌銘

明故建昌府通判竺君墓誌銘

余友竺君正蒙既卒其孤明進將奉君之柩歸葬先期以別駕曹君文瑞所為狀跣而及門請銘且曰先君辱交先生有年銘先君者莫宜先生余感於其言而受之按狀君諱端正蒙其字也世居四明奉化之狀元鄉祖諱某號獅山處士考諱某號青雲先生皆匿德藏光為時令人妣袁氏戶部照磨袁文質之女以節孝聞事載郡誌君姿豐偉少有至性年七歲失

怙哉與母居即知向學稍長遊邑庠從鄉先輩侍
御陳公受周易沉潛理數之學不事訓詁落筆為文
章辭氣勃勃名聲出同輩遠甚然獨不利場屋再進
再屈年四十始膺貢入太學今少司空陳倉劉公時
為祭酒每試諸生必以君之文為優等且期以遠到
成化庚寅謁選天官授江西建昌通判建昌雖善地
然民賦恒後期不以時輸急之則怨且謗君爬梳宿
逋徵歛有方而賦入遂如期為政敦尚風教有夏氏
之風母訟以不孝君諭以天性母子遂孝慈如初尤
勤於民事南城縣白石陂壞弗以時葺至蕪漫不可

治民以病告君曰事寧有急於此者乎即與規畫具
築俄雷雨山崩洲壅陂遂以成若有神相之者其善
政率類此既滿考將奏績京師忽遘奇疾君即投狀
祈解職將東歸首丘余留之力君不可曰壯而仕老
而歸乃分之宜況平生雅嗜山水去吾鄉數里有雪
竇泉玉如峯秋來爽氣可挹吾東歸幸不即死當結
廬其旁以終餘年安能碌碌死宦途間方將治行而
疾勢彌留蓋君素患肺熱服寒劑苦多至是下痢增
劇遂不起竇成化乙巳八月五日享春秋六十以某
年月日卜葬於某山之原配陳氏邑名族側室宋氏

子男二長即明進嫡出以明經克嗣家聲次明遠尚
幼宋所出也君性至孝以早孤事母及夫父獅山公
誠意備至獅山公年既老忽得風疾手足不仁君晨
興必躬為鹽櫛保抱扶持若嬰兒然如是者幾三載
平生於書無所不讀下至星命醫卜咸習熟精曉尤
善談讌每對客論古今事若河決下流東注滾滾不
少休為詩得唐人風韻當政暇即焚香孤坐吟咏竟
日有拙吟等稿藏於家君初入選時嘗謁南昌萬尚
書於京邸尚書公遽於星學目推君五行謂後當仕
郡佐祿食十年過此則非所知至是果驗嗚呼其定

命矣夫定命矣夫銘曰

碩其學豐其姿胡弗永年而止於斯嗚呼天實為之
又將尤誰白石之墟有塘有陂惠政則存民以永思

周母鄧孺人墓誌銘

孺人姓鄧氏諱貞錫山巨族也世居邑之興道鄉考
諱原學妣沈氏皆有善行孺人幼有至性柔懿靜惠
言動不違矩度既長嫁為同邑樂靜處士周仲倫之
妻不幸姑早亡以不及養痛常在心事後姑張恩意
周至平居無疾言遽色閨門之內穆穆和整周氏內
外族衆多孺人處之無遠近戚疎一以禮人皆以為

賢初樂靜君產不踰中人孺人以勤儉克相於內絲
蓄粒聚遂大其家樂靜卒獨總家政孀居益勤於治
生孤燈深屋紡績不懈暇則訓二子讀書脩行克底
成立晚年家駸駸益昌以肥繁孺人之助也弘治五
年三月十五日以疾卒享年七十子男二長曰瓚循
例納粟授章服之榮娶計氏繼娶楊氏次珪邑大夫
選掌鄉賦娶顧氏繼娶殷氏皆卓卓有賢行於時孫
男三曰昕曰晡曰暄孫女三以六年四月初二日卜
葬於槃山先塋將葬瓚與珪先期以陳遷庵所為狀
來乞銘余與珪有連義不容辭為之銘曰

有賢鄧母德孔厚子闔門雍肅作世程子蘭玉輝映
子孫昌子豐屋良田世業隆子從夫九泉目且瞑子
揭銘幽壙永千祀之不刊子

承事郎素庵楊公墓志銘

吾鄉有篤行君子曰素庵楊公享年九十以弘治六
年二月二十五日卒於正寢卒之日鄉人無遠近踈
戚皆遑遑焉哭失所庇賴而其君子亦皆嗟悼出涕
曰哲人亡矣自今復有何所取法以為善乎越十二
月戊辰其嗣孫軫將奉公柩葬於石埠山之原前期
以朱君組所為狀踵門泣曰惟我先大父之喪諸孤

無在者不肖軫實以執事今玄堂將掩而墓石尚虛
不肖軫大懼先大父之盛德懿行遂泐而弗傳敢乞
一言銘之嗚呼公去之父行也且有連焉得辭公諱
寔字汝威別號素庵其先出漢太尉震世居弘農後
世有隨宋南遷者遂家於錫焉曾大父和卿大父茂
林孝景森皆隱不仕公資端重淳朴外若不慧而內
沉深有器識少孤以幼弱弟居諸兄間已嶄然見頭
角及長理家業商一無不能嘗掌鄉賦不撻克厲下
而事恒先集名聲益起性孝友痛二親蚤世追慕終
身事兄能推財尚義有無弗較人咸稱之勤儉善治

生平居布素蕭然見里少年有豪侈不率者疾之如
讎家世務農春月課耕短衣長帽獨行田間與農夫
野老相爾汝意訢訢如也素饒於貲而樂易好施人
有急歸我必推有餘賑之內外族姻仰給於公者甚
衆人人自以為得所歸里毗孫能戈遇凶年欲鬻其
妻孥公諭止之而厚餽以粟有俞希哲者幼而孤無
所于歸公收養教誨之卒至成人其善行大率類此
故人皆稱楊公長者名重一時景泰間歲飢嘗應
詔輸粟授承事郎非其好也平生不資學問而處事
應物動合禮度雖儒者弗逮七旬誕辰諸子欲張樂

為壽公不可曰吾方念親劬勞忍置酒以為樂耶間
居杜門養怙公庭了無一迹

朝廷崇養老之典歲時粟帛有司每即其家授之晚
攝別業於惠山西南旁擇吉地以為全歸之所有湖
山花竹之勝公白首婆娑燕嬉其中為太平遺老今
吏部尚書王公僉翰林侍講學士四明楊公守陳皆
有文記之配魏氏有賢行丈夫子三謖謨皆先公
卒女二長適義官張復次適江西按察司經歷張善
孫男二長軋承事郎即乞銘者娶蘇州衛指揮盛時
正女次蒙娶士人鄒永端女孫女二長適吳文先卒

次適義官華泰曾孫男五曰渭曰浚軋出也沒以公
治命繼叔祖謨後餘潛冲濤等尚幼銘曰

有古長者敦朴無華揚芬漢史德音孔嘉千載寥寥
孰繼其跡有美楊公斯人之正不矯不偽不矜不盈
孝敬翼翼鄉之老成豐屋良田克蔭其後積而能施
不私其有白首婆娑天錫高年有孫有曾既庶而賢
石埠之陽全歸於此後人敬承尚受餘祉

芝亭處士墓誌銘

君姓陳諱益字公益芝其子其號也其先自宋元著
姓無錫代有令德休聞五世祖以雍睦之行稱於時

有司嘗表其里曰睦親用式於鄉邦邦人化之今其坊尚存祖德新以人才薦為程鄉縣稅使克濟其美考大猷號東野秉德植行含而弗施君兄弟五人慶澤攸萃咸秀而良世儼之潁川荀氏烏君其中子也妣周氏君和美自喜善交友不為矯異之行然質甚高博古精鑒識自漢魏已下器物若圖書鼎之屬人所弗能辯者質於君即真偽了了若宿習者凡有所創製其規畫恒出人意表雖宿工老師皆自以為不可及生而家富貴而能持已以謹一不為非禮事嘗客遊京師值

天子方憂邊募能出馬佐軍者授以章服比君之事
黨操寺人權氣勢薰灼將以是為君榮君謝不欲或
強之君曰布衣吾分耳吾豈緣冰山以冒榮利哉卒
弗從飄然角巾東還時咸嘉其有尤誠克脩先業恒
惴惴惟恐失墜睦親坊嘗圯壞君曰事寧有急於此
者乎即撤而新之家有洛陽名花大使公嘗與諸先
輩賞咏之風流文翰極一時之盛百年以來君保持
如昨日花時輒陳詩設宴與客歌飲其下以象先公
之存其雅行類如此居閒慕西山陸子泉甘與名士
大夫七人作約每旦課僮僕往汲自臨風煮之仍剖

竹為符與寺僧相約以取驗如蘓長公故事時君之
季玉溪亦在約中嘗有一瓢殘月和歌汲七斗清風
向曉分之句人皆傳誦以為士林佳致云晚益曠達
結草堂南園有亭花池竹之勝日徜徉其間適仲兄
秋林公以尚書工部員外郎致政歸君數延致之烹
鮮擊肥日與諸君昆季相序為歡樂清辰良景必擇
勝而遊遊必之山水佳處陶然自適也忽瘡作歲餘
弗療竟卒時成化十三年八月廿二日春秋六十有
一配許氏君始無子以長兄季子用祥嗣後有子用
齡君卒時甫六歲女一適楊孟賢好古以詩鳴惜弗

壽先君卒以成化丙子四月某日卜葬于邑城西惠
山新原李玉溪以君行應銘法宜有文以掩諸幽爰
介其孤用祥以狀來請其君之世交也曷敢以不敏
辭為之銘曰

不資世以為榮不餽外以為浮我安我分我心則休
襲芳趾華世德作述胡周而壽弗足以理則
懔懔吾將誰尤銘以揭耀庶永賁乎茲丘

尚樸處士墓誌銘

去古既遠士皆餽外以釣名巧詐紛紜俗日趨而下
如風靡川逝茫乎莫之能止吁可嘆也間有能薄虛

名而隆事實敦行誼而薦天常如古之所謂悃悃無
華之士豈不卓卓乎為難得哉此吾於鄉處士邵君
叔莊所以深有取之也歟君失父母祖母龔鞠養底於
成立稍長以母命館甥於毘陵殷仲實氏仲實素以
賞雄而子幼且孱弗事事君入門能服勤代勞相伴
實益大其家久之仲實子駸駸向壯君慨然曰婦翁
門戶不單矣吾尚可舍所自出而久從異姓哉言於
翁求還翁留之不可得曰母久溷吾甥其治裝以歸
遂返其室君性孝友純篤初居毘陵時聞母喪號慟
幾絕哀慕至終其身伯兄叔端為掾京師父乃得官

閩之長樂縣尉貧無留貲君曲為資給不少吝季叔
明登世收養其孤恩踰所生長為納室制產人皆以
為難與人交不翕翕熱而誠意獨至宗姻族黨有貧
不能自存者必輟其餘賙之雖數不厭然素負直氣
侃侃能面折人過失尤嫉脂韋軟媚人弗與共事其
為人類如此噫若君者其可槩以流俗人目之哉君
諱莊字叔莊別號尚樸其先汴人宋南渡後占籍無
錫之開化鄉曾大父某大父某考某皆潛德弗耀卒
於弘治辛亥十月十九日享年七十有四以卒之又
明年十月十二日葬于開原鄉之青山里配某氏子

二長曰夢輪舉授承事郎娶陳氏次龍邑庠生秀而
能文娶顧氏女一適王宗美皆從室黃氏出也孫男
二葬有日龍先期以其師趙廷臣所為狀來乞銘廷
臣余忘年友也義不獲辭為之銘曰

服鷺為浮獨幽貞子世逐逐而隨獨守恒子孝敬
以自持德孔馨子吁嗟處士作世程子我銘以貞之
貞幽局子

周孺人金氏墓誌銘

月窓周公齊廣既喪其內以宅兆未定久弗克葬今
年春始得地於上福鄉渭字之原土厚水深而卜亦

習吉公喜曰是可以蔽吾妻矣則間來謁余徵銘以
掩其幽且言曰吾妻姓金氏其先娶之蘭溪人元有
諱履祥號仁山先生者其遠祖也自仁山而下不常
厥居至國初其高祖光遠始由暨陽遷無錫因占
籍焉祖伯銘孝孟昭皆以警鳴為時聞人吾妻胚胎
前光生有淑質其父絕憐之恒曰吾惟一女不可使
離目前必擇壻而館之於家及笄遂歸於吾自吾為
甥於金氏也見吾妻入而事其父母承顏順志於溫
清定省之禮不敢有闕焉出而處其內外族姻聲柔
氣和於言語飲食之節不敢有先焉其平居自奉無

率衣鮮食惟菲薄自甘至紡績紉縫之事則身親而力任之一不委之他人如此者幾四十年蓋不見其有所異也且性明慧識道理向吾以外氏嗣續有人將返室於宋村新居吾妻悉推所有於其外氏不挾私以傷大義欣欣如也及入門痛吾父不幸蚤世每以不及養為恨則移所以事其母者事其姑恩禮彌篤及卒哀毀踰制人咸稱焉吾以醫應士大夫之求旦出而暮入吾妻必問君今日所治者何人其所患疾若得熱惡否聞其無恙則喜否則慘然弗樂也吾老且病成化間嘗被留京師十年吾妻恒念我不

置歲時必遣人問安及遠致衣絮食物以恤吾寒饑甚矣吾妻之賢若是也其治家亦有常法訓子孫以禮課僮僕以勤率諸婦以恭儉慈孝至於理財殖產無一不得其宜故使吾居外而不以家為恤者吾妻之助也今其已矣其淑德懿行稔非託諸文字則無以著其不朽且塞吾之悲此吾所以請銘於子之懇也時余以病未及為既而其子敷又奉其西賓濮景饒所為狀來僮請余忍不銘之孺人享年六十有八卒于弘治己酉九月二十一日葬則以歲丙辰正月十一日也子男四長敷娶華氏次歌娶安氏次敬娶

顧氏先卒次牧娶王氏皆克世其家孫男六駢麟駢駢駢駢駢孫女五三適名族餘在室銘曰

金氏之先來自蘭溪有燁其傳既儒而醫委社儲祥遂生顧入承承其孝煦煦其仁乃相其夫乃迪其子既克其家克受多祉渭原之陽永固其蔭尚蔭後人百世其昌

何孺人墓誌銘

暨陽故處士何友文妻卒之明年其子禮部進士義以其友琴川鄉進士周某所為狀踵門來乞銘且泣曰吾母姓楊氏錫山處士諱叔璫之女也楊氏代有

顯人成化間有摠憲內臺諱璿者吾母之叔也有典
禮南宮諱琛者吾母之從叔也吾母生於名族柔懿
靜專及長歸吾先君為何氏爰婦入門事舅姑以孝
處族黨以和字卑幼以恩吾祖梅鶴翁每稱於所親
曰新婦大家子動止不凡門戶有光矣未幾祖母吳
忽患風痺帖帖臥牀褥者三載吾母晨夕扶持爬痒
櫛垢操匕飭而飲食之憂勞盡瘁久而不懈迨祖母
卒吾祖痛其早世誓弗再娶家政悉俾吾母代總克
敬克勤內外斬斬吾祖喜賓客座客恒滿吾母主中
饋烹鮮擊肥日以為常食畢問有餘必曰有恐吾祖

之欲有所與也鄉鄰有貧不能自養者必勸吾祖賙恤之知吾祖之樂施也吾祖賢其能雖外政亦間以咨訪景泰間朝廷舉荒政募民納粟千斛者授以冠服吾祖欲應詔納粟而以布衣終其身意未決吾母力贊成之鄉人至今稱為女丈夫焉成化壬辰吾先君不幸下世吾母惻惻獨居時義與弟禮皆幼吾母晝理家政夜則篝燈勸讀先是吾先君嘗欲令義習禮經以圖進身吾母曰兒外家諸叔父多以葩經發身兒盍習詩以繼外氏之風先君從之歲甲辰義果以詩經入登進士其明年奉使滇南齊邊帥之有

功者事竣便道南還行囊實不持一物及門吾母已
抱痼疾見我泣曰汝使萬里外吾忍死待汝相見
人垂瘵而歸吾無憾矣迨疾革吾母乞呼我命之
曰子義汝幸有成汝遂輸忠竭誠以報國家曰汝禮
汝母之德之行宜登上壽遽止於斯不得享有祿
養痛可勝言哉謂惟託諸文字以垂不朽庶可以追
窮天之恨唯吾子其必賜之銘余與何實締姻好則
銘惡得而辭孺人諱貞淑享年五十九子男二長即
義配華氏次禮配蔣氏女二長適錢模次適顏憲孫

男五忠恕義出也恩惠愈禮出也恩為邑庠生以其
年月日葬于文林之觀基山附友文墓側禮也遠採
義之言與狀之所述序次而銘之銘曰

孺人之先出自關西有葉有年清白是持亦有顯人
乘時奮起有典秩宗有司邦紀翼翼孺人嬪於名門
遂攝家政克孝克勤良人咲言我得內助翁姑笑言
我得孝婦委社垂祥篤生佳兒翱翔青霄厥聞四馳
祿養方臻觀化何速彼蒼情情善不獲福觀基之陽
喬木蒼蒼我銘其幽千祀有光

故處士張公茂誌銘

邑處士張公既卒以明年某月日將卜葬于萬安鄉
張高庄之原其然愷先期具公及其先孺人行實來
授余曰愷不天甫數歲先妣即棄諸孤葬而未銘蓋
有待也今先考又不祿合塋有曰顧玄堂之石未刊
不肖孤大懼先考妣之德鬱而弗彰子其為一言誌
之某公姻家子也雅知公為人將何說之辭則為序
而銘之按狀公諱璣字廷美號養浩妣張氏世居江
陰之潢溪祖子茂考篋耘適其號也妣以貴雄於鄉
耘適長身玉立惆悵有幹略永樂間嘗掌鄉稅豐出
寡人多施德於人人至今稱之生六子公其五也公

幼穎敏眉目秀異卓卓不類常兒特為祖母過所鍾愛常撫其頂曰兒不凡他日娶婦必擇大家時無錫鄧文遊以無子方擇婿名門將託世祀得公甚喜遂諧東牀之選及就甥館而文遊墓木已拱獨遺老母寡妻在室衰門薄祜鬼責人欺家故饒良田疇里豪乘間多所昏虐公毅然悉理直之刮垢磨光聲生氣長門戶始有所賴平居恂恂執子婿禮甚恭事二母如事其親晨昏之禮不敢廢焉祀其亡人如祀其先烝嘗之禮不敢缺焉及二母卒殮葬皆如儀於是人咸謂鄧氏真有子矣蓋忘其為婿也公雖樂易長者

而內甚剛直侃侃有分辯不為私曲故鄉人有爭論
不公率詣公取決得一語折衷之即帖帖以止尤慎
於取與一毫無所苟嘗輦米入城遇兩鬪者誤墜白
金道上公適見之為却立守視他人弗覺也鬪已兩
人索金弗得大窘汪然出淨公徐語之曰毋恐金尚
無恙也指視與之兩人喜出望外願以其半為謝公
笑曰吾非市賈惡用此不義之物為哉去弗顧觀者
皆嘆服晚年杜門不預外事惟以勤儉力田訓諸子
曰汝等俱有常分慎勿効鄉里小兒以非道取富貴
自速禍敗語甚諄切獨奇愷在齟齬間即遣從明師

習舉子業卒底於成性喜飲酒客至輒頽然自適久而得寒濕病醫弗能療病且劇語不及他獨呼愷曰汝幸有成他日能盡忠報國則吾目瞑矣未幾而遊寔成化二十三年三月二十三日也享春秋六十有九公平生敦大義雖為後於鄧而常存木本水源之恩曰忘本以滅親不仁受人之托而絕其祀不義遂以譜等屬籍故居為祖宗不絕之祀以愷等占籍無錫奉鄧氏後其立心制行鑿鑿不苟如此孺人諱貞姓鄧氏邑舊族文邀之女也少孤獨與母居讀書有賢行婦儀母道有光宗黨凡處士所以為子為婿兩

盡其道者孺人內助之功居多焉以成化元年正月
一日卒享春秋四十有二葬于卒之又明年十二月
二十六日子男五長曰譜次曰謨次即愷賢而有文
章登成化甲辰進士其道將大顯次詔次訖女二長
適余弟永孚次適強栢孫男七璠璣餘未名孫女三
銘曰

嗟嗟處士其德孔碩毓秀潢溪流祉無錫館於衰門
如田未菑爬刮剔赤手起之堂有寡姑隣有強禦
我時其養我折其侮片片其行克儉克勤誰其相之
有美淑人其淑維何實宜於家德則無忝壽胡弗遐

張高之原閔此雙玉昭潛有辭永示來躅

故楊母沈氏墓誌銘

余姻有淑行之婦曰楊母沈氏者事舅姑以孝居夫
喪以哀為人冢婦餘三十年小心謹畏每旦必上堂
問舅姑安否安則喜否則退有憂色雖祈寒暑雨弗
少間翁姑以其志之確也數慰勞之孺人不自滿益
虔以恭如是者蓋終其身焉居夫喪三年如喪考妣
癯然不能勝衣其言必戚其哭必哀其飲食必麤糲
其衣服必布素下至牀褥屏帷之類亦必斥去絳色
喪既除而哀不少衰如是者亦終其身焉夫自世教

堯王化不行閭門之內慙德多矣求如孺人於婦道
妻道兩盡無愧者豈易得哉此吾於孺人所以深有
取焉孺人姓沈氏諱慕貞錫山世家裔出宋太學博
士松年之後曾祖仲衡祖用濟考德潤俱匿德藏光
為鄉望人妣趙氏宋宗室女孺人姿巧慧靖恭寡言
仁孝其天性也幼為父母所鍾愛及笄歸故承事郎
楊君孟起楊固巨族而孟起偉丈夫遇事軒豁有為
孺人處內坦坦于于恒以陰道相之而家益以昌平
居無疾言遽色尤不喜纂組華麗之習處族人長幼
親疎間盡其宜是皆可傳者也成化丁未八月二十

二日不幸遘疾卒享春秋五十有二子男一曰軋娶承事郎盛時正女女一遣義官華表孫男二曰渭曰浚尚幼浚以祖命出繼叔孟賢後孫女二卜于卒之又明年四月初一日合葬於何家灣故承事君之墓其孤軋先期以其塾賓吳鳳翔所為狀來乞銘孺人余之妻妹也知其行甚詳而軋又以禮請忍不銘諸故據其行之大者序而銘之銘曰

博士之裔郎官之妻翼翼其孝肅肅其儀厥孝維何恪守婦道一息不懈自壯至老德則多有壽胡弗邀自古皆然吾又何嗟何家之原有固其宅鑽石埋辭

永世無歎

五峯遺稿卷之二十一

故鈍軒先生余公墓誌銘

弘治三年十二月一日鈍軒先生卒年六十八歛之
廿又六日其孤方將卜葬於龍山先塋先期以所為
狀偕其姻潘君繼芳踵門來乞銘且泣曰先君生而
齟齬窮不能振起於時死必待執事一言為重執事
率哀而昇之即先君瞑目泉下不恨矣余曰先生行
應銘法子又以禮葬銘惡乎辭按狀先生諱魯字師
曾其先晉陵人上世有諱埴者始徙錫之青城鄉代
有今人五世祖鎮卿通尚書春秋二經仕元為烏程

教諭曾大父彥衡以文學知名預修永樂大典書
歲將授官不幸卒大父同文博極群書為後學領袖
其所造就尤多考民望年甫二十七而天先生生三
歲失怙七歲舅奪母志惇然無依賴祖母魏鞠養歷
於成立既長痛自剝磨委已於學書史基卜耻一不
通日下帷自課戶外無一跡學成開門授徒攻苦食
貧於身外寧一無所好然猷喜手談諸生退講後輒
與客焚香坐爽矮屋踈簾一幮相對竟日忘倦筆瓢
屢空晏如也世多知先生者獨以鈍自處故晚號
鈍軒以寓意然性介潔不能泛沈於世以是交游亦

不甚廣晚得痰疾不復出竟以是卒娶丁氏無出男
一曰方即乞銘者先生鎮鈴子也年少工文辭有諸
父風女一側出適陳本暢孫男女各一尚幼銘曰
余為巨族世以儒鳴孰開其源曰惟鎮卿烈烈彥衡
詞林巨擘內閣脩文聲光赫奕及鈍軒克繼克承
遙遙相傳牀頭一經世以巧取我以拙守人謂先生
大羹玄酒德則孔碩壽胡弗延銘以昭之以永其傳
故醫學訓科橋庵施公墓誌銘

橋庵公卒之明日其既走哭又數日余宦轍將西其
孤序等奉舜明李君所為狀踵門請曰先君與子風

有姻好今葬有日顧窆石尚未有銘敢以為行李累
其泣曰余頃南還公觴之於小軒中席尚未寒而公
遽不祿余尚忍銘公哉辭不獲按狀公諱齊字濟民
姓施氏其先汴人宋有為翰林醫官諱某者從思陵
南渡家於蘇迨元南雄路醫學教授諱義號正齋者
始遷于錫實公之曾祖祖仲模無錫州醫學學錄考
中立國朝太醫院醫士公生而穎悟年少時已能
誦內經諸書稍長從俞一瓢末靜邊游遂旁通書史
醫士公在金陵公傳母王往問請留醫士公曰兒不
凡當邁迹我家不可使久從京師少年游其亟返爾

廩於是公即歸從兄澤民益講明於醫經脉竅竅逆
節乃解用以試人輒效心恢恢焉恒存利物目以楮
庵自號正統初本縣謀辟訓科諸長老相與言施某
世醫子不宜舉耶合詞起公公嚴重有幹局雖僅試
小官以廉慎獲知上人巡撫尚書周公都御史崔公
每獎諭之故雖職於醫而邑有大役必命公監攝曰
得施審賢於群從事嘗領千夫勦浚丹陽運河畚鍤
之功不勞而辦邑城南陽春橋壞有司捐千金重造
命公主出納毫絲不以自累尋又督四邑秋稅輸京
時北虜陸梁都人恟恟車次通州挽卒欲散去公諭

之曰若軍所輸者國稅一舉足即為寇賊資柰何輕動於是衆志稍定卒竣事而還事父母最孝入官時醫士公已捐館獨奉母居恒曰吾不幸失怙不得祿養如矇之不窺日賴有母可少忘乎奉養彌篤及終執喪哀毀蒞祭誠絮質與文稱事二兄友愛尤篤同堂自少至老怡怡無間言弟善幼出繼人後晨夕過公必留止不忍其舍去撫諸孤姪有恩一味之甘必共故邑稱禮讓之族必曰施氏云公性剛方惡齟齬自用然矜人之急嘗在京見宗人死而無歸為具棺祇飲之妻弟為鬱攸所虐則助其作室其為義多類

此監察御史倪君嘉之題其堂曰寶義翰林學士蒲
田林公為之記人稱為寶義翁晚年解篆家居勅諸
子曰烹鮮擊肥為供具客至則觴飲竟日醉後輒歌
唐人近體數章以自怡與吳太僕永貞許沂州公大
輩數人為優老會花時月夕杖屨往來其武不東阡
則西陌人視之若神僊然公清明康裕方圖永年一
夕忽奄逝寶咸化癸巳正月五日享春秋七十有三
配江氏元常州總管大海之裔處士永常之子生丈
夫子五長序次廣次度充賦國學生次廉嗣公為訓
科次庸俱翹然出人右女二長適王彥祺先卒次適

殷汝璿蔭居不二志孫男五女十二人以是年某月
日卜葬于開原鄉大池塢先塋之側嗚呼世云醫三
世弗斬其後必大施氏自南渡以來數世以醫稱至
橘庵公濟之以儒而其宗益亢以大信矣哉銘曰
厥宗之來自汴鄉纓冕奕葉源孔長世有積德傳青
囊濟以儒醫垂書香翼翼橘庵叔且良矯矯梧桐產
崇岡才足裨世教玉常天錫胤嗣森琳琅華顛謝紛
志徜徉嘉賓盈門酒盈觴池有躍鱗園有芳葛巾道
遙樂時康候焉天游渺其戲千祀燁燁昭耿光

崇義處士李君墓誌銘

崇義處士卒之又明年其子九臯奉鄉先生工部員外郎陳公所為狀謁余銘其墓嗚呼余與君世同里閨而余生最後余為兒時之所締知且姻家也銘何辭君諱某字季富其先出自開封有諱曄者仕宋為中奉大夫生子傳歷任館閣靖康間扈蹕南遷至昆陵卒葬定安東鄉回家焉子琳仕至敷文閣待制提舉江州太平興國宮隴西郡開國男食邑三百戶賜金魚袋卒由琳而下至九世祖仲玉為廉訪使始徙無錫新橋門居焉家世貴顯曾祖達卿祖國珍考惟德隱德弗耀妣謝氏君生而不凡甫齠齔而考不祿

鞠於母謝保抱携持惇焉忘艱底於成立比稍有知
即思奮樹曰吾蚤失怙如瞽之不窺日吾倚母恩其
猶天乎於是竭力以共子職時奉甘旨問衣燠寒久
而弗替洎沒喪葬如禮事兄治本翁尤恭謹怡怡愉
愉墳麓相應人皆稱其孝友襟度尤洒落處艱若夷
其於得喪不甚戚戚恒嘆曰人生良幾何至懷千古
憂吾知順義以達命而已遑恤夫他哉故以崇義自
號每花晨月夕偕同居之良歌遊里中甚適歸視其
橐之僅存則弛然而嬉其於世利澹如也當正統間
天下殷富人思為樂而吾里尤盛上元張燈歌笑之

聲窮日夜君與治本翁恒為之倡吹竹彈絲以歌舞
太平至今傳以為盛事尤善閱人嘗遇異人授麻衣
相法言人禍福率多驗天順己邠余為諸生嘗謁君
相君撫之曰子骨臞而清法當貴又眉間有雉氣今
秋其登第乎已而果然然斬而不輕閱人故名亦不
甚顯年未及笄其子九臯即起承之克自樹立家日
饒裕以是君益消散其武不東阡則西陌若天相之
然一日無病而卒實成化丁酉七月一日也享年若
干君性雅不喜浮屠法且死猶以為戒配高氏子男
一即九臯娶吳氏孫男一曰思誠聘陳氏孫女一鳴

呼吾見世之勞生以殖貨者日操竒贏坐市中以競
錙銖至陸行羊腸水行艤塘濱九死而不之止曰吾
慮夫後之人卑贏也追死骨未寒而平生之儲已為
不肖子蕩覆漸盡若君者義以達命休休焉以居而
其後亦未嘗不裕以是吾益知人之貴富賤貧真有
造物者司之不可以幸而致彼倏倏者徒自苦也然
則君之賢於人遠矣哉是宜銘銘曰

舉世業業勞其生朝遊咸秦暮燕京吁嗟崇義何坦
平我羸弗虛心即寧嘯風棲霞樂幽貞坦焉而嬉歌
太平繼以賢胤家孔亨詩禮奕葉承冠纓芙蓉城中

花冥冥神之遊兮慘余情寔石
鐫余銘千祀燁燁傳芳聲

宜興蔣母墓誌銘

余聞宜興多魁梧之士惟故蔣君克敬為首稱焉厥
配徐孀人尤賢明為女流中翹楚無子以夫弟鏞子
漢為嗣愛養篤於己生孀人下世鏞卜日啓兄箱崩
之藏以禮祔葬前期以余姪金所著事狀來乞銘某
昔官南都克敬嘗奉贄來見目得識其人品之高今
其配殉德以歿而鏞不沒嫂氏之賢懇懇以銘為請
亦賢矣哉按狀孀人諱秀貞邑士徐光大女也稚齡

以禮自閑處內閨足不履外庭慎言寡笑嫻長見謂
是女不凡宜擇良奧歸之時將君克敬髫年秀穎異
常兒厥考文珙又善藻鑑人物謂徐僊族家法素嚴
女必漸染彞訓賢非他女可儷遂委禽焉及笄來嬪
于蔣蔣故大家食指僅千數孺人綜內政相夫樹家
一錢尺帛不入私室事舅姑以孝處婦姒以睦御媵
婢以惠有過溫言戒諭弗加詬杖晚年舅喪明便身
之衣適口之味躬具以奉日命臧獲左右扶掖故舅
樂得其孝雖暫忘其暫也既而克敬以貲雄有幹局
舉為萬石長孺人勸曰吾雖婦人竊聞違天則取禍

利已則病人君能用此為戒吾之願也人謂克敬久
典鄉賦上不獲譴於官下不歛怨於民孺人勸栢之
功居多焉居無何舅夫相繼淪謝孺人以重哀致疾
臨絕以鞠漢為言寔某年某月某日葬用歿之後某
年某月日享春秋六十有五其生則某年月日子女
某余觀古之賢女貞德表表者先儒多為立傳流譽
千載今孺人賢德如此余雖傳而播美于世亦宜葬
而銘諸尚何不可哉銘曰

彼其者媛作君子述賢明貞淑伊誰可儔惟命于天
子多不育為後以姪宗祊是續茲焉云歿有耿其光

埋玉何在箱嶺之陽松檜桓桓鬱有佳氣靈秀攸鍾
在此後裔

明故奉直大夫東平州知州致仕劉公壙誌

鄉先生劉公卒之明年其子賢泣以告曰賢之先人
實有道德文藝以光於邦家以裕我後之人而位不
稱德不獲躋上壽以沒名不在太史氏不肖無能顯
揚乎先德廼惟是懼謹以狀其行實惟子嘗及先人
之門銘先人者必子之宜余捧狀以泣曰嗚呼惟小
子不敏先生實教惠我以底於成而今已矣尚忍銘
先生哉然事先生父能詳其事銘矣辭先生姓劉氏

諱弘字遐遠其先誦入五世祖莘老倅蘇州羅避居
無錫龍山曰家焉高祖彥卿曾祖仲達祖思忠皆履
仁秉義父志和益慤以勵成化間以先生貴封長垣
知縣母汪氏贈孺人先生少英氣自高慕古人奇節
俸行視世俗屑屑無足動其意者性尤至孝母嘗病
目失明心忤忤焉父益躁怒醫不即奏功先生大戚
無可以致其誠則號泣焚香願天每旦親以舌舐其
目時進甘旨操匕筯而飲食之或舁於背嬖遊庭戶
間以務悅其心久之母目忽復明衆咸謂誠敬所感
時別有孝慤之徵事已具今方伯盛公所著別傳讀

謬譽雖自為諸生時已赫赫有文名正統九年領應天府鄉薦然平生不喜科舉文字獨喜漢司馬氏班固楊雄及唐宋以下韓柳歐蘇諸家文悉取而熟讀之汪洋演迤操觚為文立敷百言皆有蒼深玄遠若探海賈之囊奇珍錯落觀者不覺目駭而心掉試禮部不遇或謂凡舉進士業宜用時文體柰何効古先生拂然曰文不師古顧効俗儒小子語也志益勵然試愈不偶視同輩之締童繪句者已朱其輪而已尚因諸生中乃嘆曰余不負科第而科第負余遂盡棄其業詩賦更有同罹知長短長短古猶地新地於河

上淖下濕民不寧厥居先生至率民築長堤捍水完
公私廬舍數百區中郡若朝蠲賦之在民者什八九
民得去卑濕復徭賦皆歌謳道上化憂為恬易危以
安則興學勸農既而教民禮讓不三載治行卓然為
畿內最嘉禾瑞麥貢生龐畝政滿蒲人壯者呼老人
帝相率止其行不得則詣

闕上章請留執政以蒲人宜先生欲還政於蒲或以
先生才鉅而器宏久歛其惠於一方非政之宜遂弗
果進順天府推官仍以治蒲勞効賜勅褒獎先生益
感勵順天居輦轂下豪惡無賴皆覓而冠相緣為奸

利急則行錢紙調數得脫先生至一編以詰無所貸
時府尹嚴鐸以吏弄稱空視一府嘗以疑獄付先生
理先生一閱知其竟盡釋去乃嘆曰予今之子容也
禮部尚書姚文敏公尤所推許嘗以韓稚圭蘇子瞻
推官照封事紫期之弊出知東平齊俗悍強賦不以
時解其尤無良者恒持官府短長以撼長吏先生諭
以義皆屏息聽命曰是嘗治京兆有聲者何可犯威
行仁施小大帖服先生吏治明日所受書檄立裁決
庭無留事獄戶可羅雀然資嚴重不喜事權貴人每
歲部使者行屬相約不得過東平曰毋撓劉君政其

為上下所敬憚如此髮未種種數移疾上章請老不
許成化乙未隨例覲京師懇請許之既得謝扁舟東
歸疏林壑以放志冷丹石以佑疾聚詩書以教子天
故不慙以成化十三年某月日考終於家享年六十
其明年十二月初九日葬城西歷山之原配盧氏封
孺人子男四長即賢為邑庠生娶趙氏次壽先卒次
恩聘華氏次惠尚幼女三長適盛堯臣次適余弟仲
孚次社本所著有長垣誌家範節要蘇詩律解湖海
脩急花封手集農事機要俱行於世云

虞士錢君續誌

錢孟淳卒之若干年是為弘治某歲其孤松又卒門
卑無人初孟淳年三十無子嘗以兄孟潛子元盛為
後而矢後十五年孟淳得羸疾且死泣謂孟潛曰兄
疇昔字我教我其恩如天今不幸病且死而後嗣不
立忍使他日為餒鬼也兄仁者後必有子其以後我
尋卒孟潛為給喪合族謀曰喪不可無子而嗣不可
久缺也以孟潛之子松後至是又卒孟潛慟曰吾為
孟淳圖後亦至矣一男死復立一男今又死柰何則
又會族長老謀定其所宜立者僉曰而忘孟淳臨終
之言耶今而子生而髮已燥矣後孟淳者必而子無

疑孟濬曰諾遂以其為孟淳嗣寔弘治之某年也嗚呼當孟淳之臨終望嗣也焉知孟濬之必有子而孟濬之立松也亦焉知其不克令終而為孟淳後者卒孟濬子嗚呼其天定矣夫其天定矣夫余嘗評臨安異人其子孫固自不凡今觀孟淳兄弟死生相周之義其果賢於人人遠矣孟淳諱淳號朴庵其平生行實及卒葬歲月已載諸表誌茲不錄而所錄者特其繼續一事云

東郊處士陳君墓碣銘

無錫有篤行君子曰陳君文用卒之明年其嗣孤禾

將葬君於錫山南靖翁墓側既卜吉君之弟今致仕
福建左布政使朝用撫君事行為狀間來屬某文其
墓上之石且曰否則無以貴諸幽辭不獲則敬受而
為之序曰君諱質字文用號東郊其先出有虞之明
公世為名族曾祖某祖某皆以行誼高里中考某累
官南靖知縣贈奉直大夫吏部考功員外郎妣張氏
封太宜人君幼資醇謹不喜為嬉戲無益事及長即
有志脩身保家勸之仕弗應南靖翁雅愛之幼南靖
為貴州新添衛知事間關涉萬里外而祿入又薄君
恒隨侍以業商供養凡甘旨藥石之需胥自君出南

靖與太宜人皆樂安之殆忘其在新添也未幾苗賊
負固以叛率犬羊圍城君冒矢石親立行間自効或
謂君書生宜稍自愛君泣曰吾親在圍城中敢惜死
耶弗為止久之食盡君以貨幣啗賊易米以供朝夕
得不至困乏及賊退南靖喜謂人曰微吾兒吾為南
荒餒鬼矣城圍既解而南靖亦以任滿當遷然尚以
事未即行君乘間進曰大人久蹈不測之淵何尚稽
留弗去也則先奉太宜人避地湖南俟南靖至俱返
卒脫親於難人皆以為孝君平居如不能言及遇事
帖帖善處孝敬孚於親義讓行於兄弟惠愛及於宗

族姻黨尤善與人交詞平氣和藹如也天順初隨南
靖謝事還始為久安計築草堂東郊以躬畊自娛非
吉凶慶吊事跡不一至城府時朝用為考功郎中有
重名家門貴盛君處之自如未嘗憑藉聲勢少自矜
眩人以是益高其行成化間嘗視弟京師遭

天子方脩馬政君應詔市馬輸邊得拜章服之榮事
訖即浩然東歸閉門益不出年六十有八不幸以疾
卒寔弘治甲寅二月十八日也葬以弘治乙卯十二
月二十四日君兄再娶元配唐氏繼室吳氏子男二
長禾娶成氏次稷娶馬氏女二適單仲厚許奎孫男

某銘曰

翼翼陳君行恪而醇貞不溷俗孝不違親其孝維何
承承弗替親在南荒間關隨侍其貞維何不矜不盈
閉門養恬東郊是營書稱吉人詩咏良士以古視今
繫公其是錫山之陽有固其藏銘以昭之千祀有光

尚古處士潘君墓碣銘

景泰甲戌十月望日吾錫尚古處士潘君卒以是年
臘月九日葬龍山先塋之次矣距今成化庚寅越十
有七年厥嗣繼芳始謀伐石庸碣于墓奉其舅氏范
止庵緝熙所為狀介予友郁景章來金陵徵予銘潘

榮陽世家自宋徽猷閣待制性欽曰汴扈蹕而南以
夫人袁氏乃太博默之女家無錫遂占籍焉六傳至
元無錫州醫學教授仁仲是為君之曾祖祖克誠號
蒲石太醫院醫士考韞輝號松立克世其業以傷寒
科鳴于時妣俞氏戶部尚書溥之女君諱贄字時觀
自幼聰慧秀朗為松立翁所鍾愛遣從里儒余樂真
日章遊不煩程督而學日就緒既長尋誦益力日章
歸之妻以息女既而曰醫吾家世業吾可違乎於是
悉取素難靈樞等書讀之參會於劉張李朱之說時
丹溪之外孫烏傷時復庵用思遊學於吳君與張用

謙滿乎平吳仲高丁廷瑞從游講授深得丹溪正傳
心法集成摘玄方論二十卷行於時遂大暢厥旨其
視人疾取證形色定其死生先喻日昃微之十不失
一名聲隱隱出行華右提學待御永豐彭公勗按臨
至錫得危疾君為赴之因試其術之精令默讀傷寒
拍掌賦至終不遺公深敬禮欽薦入太醫院國辭不
就其存心制行動以古人自期乃扁其所居之齋曰
尚古毘陵胡忠安公源潔為記之人咸稱尚古先生
嘗夜裏寢火災有婦倉卒以一筍投君手中而去獲
歸啟之皆金珠首飾遲明往候婦果號泣於道君歸

之得實南隣顧氏物也悉還之鄉民詹亮被誣盜繫
獄君為辨於官得釋曰請納一女為婢君為謝遣平
生志在惠濟求醫者不問貴富賤貧不阻風雨寒暑
而未嘗責報資婚聘葬恒汲汲也早喪父奉母至孝
母嘗疽發於乳瘍醫云當吮以拔毒君即請以自吸
膿竭疾遂愈後母以天年終哀毀踰禮凡遇親之諱
辰必變服茹素朔望及出入必廟見春秋省墓必號
泣事兄時助克盡天顯君風格清遠動循矩度恂恂
如處予喜怒不外見不議人之過惡故章逢之士多
樂與游每與同庚數輩為真率會勝日則崇肴載酒

于五湖九峯間搜奇弔古以爲樂所居有容膝軒中
化琴書名畫外列竹梧奇石其高曾以來所交皆元
季名士若楊鐵厓張貞居柯丹丘倪雲林輩皆嘗集
集其間倡酬詞翰往復簡劄燦然具存君日處其中
冠衣端坐手一編不釋間發於詩詩成則擊節歌鳴
鳴客至輒焚香淪茗意度翛然也善楷書嘗錄先世
碑銘及名卿韻士贈遺詩文爲世美集十卷重脩家
譜著醫學淵源未及脫稿得疾革惓惓囑妻以保
孤戒勿庸緇黃以飾喪遂卒其生永樂己丑八月十
三日享年四十有六其配先余後范皆有泚德子男

一緒即繼芳有學行范出娶吳繼姚女三皆余出彭
雲冲周永年陳尚文其婿也孫男三日箴曰簡曰符
皆姚出嗚呼士之有志用世者苟務濟物非必都高
位食重祿能假一術之仁濟人於天死獨不可行其
志乎若處士者非其人歟使永夫壽而被其濟者夫
豈不博哉卒止於斯悲夫銘曰

有隆其先兮克奮起而斯續其志也仁兮行疇云其
不穀所施其未溥兮不遐以趣有崇其岡兮安乎吉
卜千秋萬歲兮歸斯斧屋嗣人有承兮尚其瞑目

靖江金侯德政碑銘

民可以恩懷而不可以威懾懷之以恩則感感則上
之情親而其知報禮也重此召公所以見愛於南
國朱邑所以見思於桐鄉也苟恩不足而威有餘則
民將疾之如讎視之去來若逆旅過客漠然無所動
於其中此民心好惡之至公亘萬古而不可磨滅者
吁可畏也余友金君洪明之鄞縣人才英而氣充挾
所有而待用者有年矣今

天子即位之明年以名進士來知吾常之靖江縣事
靖江本屬暨陽屹然居大江之中

憲宗朝始割而為縣四面江流際天賦薄而地磽鹵

謂不足以辱君理君笑曰是豈不足為政耶至則曰俗為治禁僧道巫覡不得以異言異術惑其民使民曉然知教之所在然後興學育才脩廢舉墜聲隆隆日起先是民田之圯於江水者官猶徵其租民嗷嗷無訴則去而為盜賊戶口日耗君下車盡釋其田之圯於水者六千餘畝而括濱江新淤之田當其租入曰江河之土此消則彼長吾從而更其賦不亦均乎人咸服其有識邑舊無高城深池成化之末江湖入其郭壞官民廬舍幾盡一潦下濕殆不可居君至是悉毀僧道寺觀之無額以撤其材為公署一十二所

高明壯麗制度一新又使石為梁及課民築堤濬渠
以走潦水以蠲濁汙民得去平即高其志固大先精
更治強明果決事無巨細一閱無留情宿師老奸不
得刺手初民居島嶼中不知醫藥有病惟尚祠禱多
橫死君宿以貨居善藥遇病者輒施之又博求良方
傳之民間使皆知衛生之要全活者甚衆西北邊饑
部符下郡將徵常平穀之積年在民者為脩荒計且
下巡撫使者督察曰穀不時入者有厚罰時農事方
殷民食且不足所在繹騷君嘆曰剝飢民以規免罪
非仁也力薦於當道得不徵由是靖江之民獨免暴

歟之虞時都察院左副都御史東魯佖公寶巡撫江
南舉君才堪治劇轉蘇之吳江縣去簡就煩以示勸
也

命既下庶民之壯者呼老人啼遮道留君不得則相
聚謀為不朽計聞推邑民陶純輩來徵余文將立石
記君遺愛余嘉君之能恩其民而喜邑民之能感其
上也故樂為書此以塞其請而申之以辭辭曰

郎官出宰上應列星有社有民厥繫匪輕赫赫金侯
邦之美器來官花縣牛刀小試圮堊四境江流湯湯
桑田成海民粗易償我復其征我除其額繁堤濬渠

民以休息俗吏擾擾以刻為能剥飢雖隨征歛無經
君獨于于曰民何罪仁言一發四鄰則愧易頤為笑
沃枯以膏

天子有詔曰旌其勞 詔旨伊何納君於剝不遇盤
根利器胡識輶車在門民號以呼老稚紛紛填道溢
郭磐石鐫詞以示無極匪侯之私亦以勸德